

# Consequenzas desastrusas per noss ospitals

Christian Rathgeb davart l'intenziun da l'UFS/BAG

■ **(anr/fa) Il providiment da sanadad decentral cun ils ospitals regionals en Grischun è periclità. Il motiv è l'intenziun da l'Uffizi federal da sanadad dad introducir cifras minimalas da cas tractads en ils ospitals en Svizra.** Dapi l'onn 2009 è en vigur en Svizra la revisiun parziala da la lescha federala davart l'assicuranza da malsauns. Quella ha midà la finanziaziun dals ospitals. Tranter auter dat questa nova finanziaziun dapi il 2012 a pazients la pussaivladad da tscherner sezs ils ospitals nua ch'els vuessan vegnir tractads. *Philipp Gunzinger* (pld, Suot Tasna) e 70 collegas deputads avevan dumandà la regenza tge consequenzas ch'igl haja sche pazients grischuns bandunian il chantun per sa laschar trac-

tar en in ospital. En sia resposta aveva la regenza scrit ch'il chantun perdia uschia imports considerabels e ch'i saja perquai da rinforzar il providiment da sanadad decentral en Grischun «cun engrondir la purschida dals ospitals e giavischar da la populaziun da trair a niz la purschida en il chantun». Gunzinger era cuntent cun la resposta da la regenza. Tuttina ha el pretais discussiun.

## «Nivels stgirs sur ils ospitals en las regiuns periferas»

Sco che Gunzinger ha menziunà èsi vegnì enonuschent dacurt che l'Uffizi federal da sanadad (UFS/BAG) ed intgins chantuns hajan l'intenziun dad introducir en Svizra a partir da l'onn 2019 cifras

minimalas da cas ch'in ospital stoppia tractar. «Uschiglio n'ha l'ospital betg il dretg da survegnir da las cassas da malsauns las contribuziuns per quests tractaments.» El ha constatà che quai periclitass l'existenza dals ospitals regionals en Grischun «che procuran per il providiment da sanadad en questas regiuns savens a la periferia e cun per part be paucs abitants.» Il cusseglier guvernativ *Christian Rathgeb* è à anc in pass plinavant: «Quai signifitgass la fin da noss providiment da sanadad decentral.»

## «Senza resguardar las relaziuns en Svizra»

A ses avis èn quests plans da l'UFS «in'intenziun dal tuttatfatg betg svizra, causa ch'ella na resguarda betg las relaziuns en noss pajais cun bleras regiuns pauc popu-ladas.» Questas cifras minimalas da cas tractads en ils singuls ospitals na resguardassan, sco che Rathgeb ha cuntinuà, «era betg la qualidat da las purschidas d'in ospital: D'ina cumparegliaziun da la qualidat da noss ospitals cun auters n'avain nus betg d'avair tema, anzi.» Tema fa dentant, sco ch'el ha repetì, l'intent dad introducir cifras minimalas da cas tractads en ils ospitals. «Nus faschain il pussaivel per evitar l'introducziun da questas cifras minimalas», ha concludì il cusseglier guvernativ, «e per far quai ans mettain nus en colliaziun era cun auters chantuns cun regiuns pauc popu-ladas.»



L'ospital da Sta. Maria en Val Müstair è il pli pitschen ospital da la Svizra.

MAD